

Date – 23/04/2026

Time - 18:30 -18:40Hrs

**AKASHVANI AIZAWL
REGIONAL NEWS BULLETIN
HEADLINES (EVENING)**

1. Vawiina MBSE in HSLC result a tihchhuahah zirlai exam zawng zawng zinga zaa 80.31 an pass a, zirlai titha Top 10 leh zirlaite pass na division tarlan a ni ta lo.
2. Chief Minister Pu Lalduhoma chuan HSLC a pass zawng zawngte a lawmpui thu sawiin la hlawhtling ve rih lo beidawng lova lo bei chhonzawm turin a ngen.
3. Vawiin khan West Bengal Assembly inthlan thawhkhatna leh Tamil Nadu Assembly inthlan vote thlak a ni
4. Prime Minister Narendra Modi'an Pathianni chawhma dar 11 hian 'Mann Ki Baat' programme a hman leh dawn.

<><><>

HSLC RESULT

Mizoram Board Of School Education-in High School Leaving Certificate (HSLC) 2026, RESULT vawiina tihchhuahah zirlai exam zawng zawng zinga zaa 80.31 an pass a, kumin hian kal dan phung thlakin, zirlai titha Top 10 leh zirlaite pass na division tarlan a ni lo.

Kuminah hian exam beitu hi zirlai sing 1 & 8257 an awm a, zirlai sing 1 & 4663 in an pass-a, exam zawng zawng zinga zaa 80.31 an pass a, nikum leh kum hmasa aiin pass percentage a tha zawk a, kum 2024 khan HSLC Exam hmachhawn zingah zaa 73.37 an pass a, kum 2025-ah zaa 76.68 an pass a ni. Kumina state puma ti tha ber chuan mark 480 a hmu a, nikum a ti tha ber aiin mark 1 in a hmu sang zawk a ni. Candidate zawng zawngte pass vek school 146 an awm a, candidate zawng zawng fail vekna school 13 awmin, fail vek zingah hian sorkar school a awm lo thung.

VC

Kumin HSLC exam-ah hian compartment 117 an awm a, kumin HSLC exam ah hian mipa aiin hmeichhia exam hmachhawn 1,328 in an tam zawk a, pass zat pawh hmeichhia tam zawkin mipa aia hmeichhe pass mi 951 in an tam a ni. Deficit school in ti tha ber in za zela 92.62 percent an pass a, private candidate pass percentage hniam ber in 49.66 percent an pass a, Subject malah Social Science ah fail an tam ber a, 3258 an fail a, Mizo/Language subject ah fail an tlem ber thung a,

469 an fail a, Mathematics-ah 100-ah 100 hmu mi 5 an awm baw. District zingah Aizawl District pass percentage a sang ber a, 89.60% a ni a, Lawngtlai District an hniam ber a, 61.49% an pass a, nikum ah pawh Lawngtlai District chu a hniam ber a lo ni tawh a ni.

MBSE Chairman Pu JH Zoremthanga chuan MBSE pisaah thuthar thehdarhtute kawmin, kumin hian exam zawhnate chu LOTS atangin zaa 60 siam a ni a, abak zaa 40 chu Application leh HOTS atanga siam a ni baw tih a sawi a, result bu-ah Top 10 an tarlan loh chhan chu CBSE leh CISCE bakah Board lian deute kalphung a ni a ti a, hei hi NEP 2020 in kaihraina a siam credit system leh grading system kalpui tur a hmalak lawkna a ni a ti.

MBSE Chairman chuan Zirna in hma a sawn zel theih nan Question pattern tih danglam zel tum a ni tih sawi bawkin, kumina compartment 117 te chuan admission an tlai lohna turin compartment exam buatsaih thuai an tum a ti a. HSLC result complaint hun chu ni 7 chung hawn a ni dawn a ti a, improvement pawh kuminah vek exam theih a ni dawn a ti baw.



CM

Chief Minister Pu Lalduhoma chuan High School Leaving Certificate Examination 2026 a pass zawng zawngte a lawmpui thu leh an kal zelna turah duhsakna sang ber a hlan.

Chief Minister chuan a social media account-ah zirlai pass thar te lawmpuina thu hi sawiin, naupangten hlawhtlinna an chan theih nana theihtawp chhuahtu an zirtirtute leh an nu leh pate chungah leh Exam fel fai leh hlawhtling tak buatsaihtu MBSE leh an thawhpuite chungah lawmthu a sawi a. Zirlai, la hlawhtling ve rih lo te chu a khawngaih thu sawiin, vawi khat hlawhchham chu dam chungah hlawhchham hlenna a ni lo a ti a, beidawng lova lo bei chhunzawm theuh turin a ngen baw a ni.

Mizo Zirlai Pawl (MZP) pawhin thuchhuah siamin, MBSE-in hun reilote chungah HSLC 2026 result an peih fel thei leh result felfai tak an tichhuak thei chu fakawm an tih thu an sawi a. Nikum HSLC pass percentage zaa 76.68 aia kumin pass percentage zaa 80.31 a sang zawk chu hmasawna nasa takah an ngai tih an sawi a. Matric exam a zirlai hlawhtlinna chang zawng zawngte an lawmpui rualin, Compartmental chance nei zirlai 117-te pawh nasa zawka inbuatsaih chhunzawm turin a ngen a. Hlawhtlinna chang zo ve ta lo zirlai 3,477 te pawh a lehpekah chuan hlawhtlinna chang ngei tura bei sauh sauh turin an fuih a ni.



EDN MINISTER

School Education Minister Dr Vanlalhlana'n kumin HSLC result chuan zirlaite tan Govt school a belhtlak tih a rawn tarlang a ni a ti.

School Education Minister Dr Vanlalhlana chuan vawiin khan a office chamber-ah thuchah sawiin kumin HSLC result chhuakah hmasawna lawmawm tak Govt School-ah a lo lang tih sawiin, nikuma Govt School a pass zaa 68.01 chu kumin hian khumin zaa 72.07 an pass a, Candidate zawng zawng an fail vekna school-ah RMSA School la awm nual mahse, Govt school tih hmingpu an lang tawh lo a ti a. Hei bakah hian zaa za an pass vekna school-ah kum dang aiin Govt School an lang tam a, Govt School 21 zet an lang chu lawmawm a tih thu a sawi a. Kumin HSLC result hian zirlaite tan Govt school a belhtlak tih a rawn tarlang a ni a ti.

Minister chuan kumina result tihchhuah dan chu a lo puanzar tawh angin kum dang aia a danglam thu leh top ten leh Division te an lan tak loh thu te, MBSE website-ah erawh zirlaiten an mark leh percentage an en zung zung theih thu leh hei hi board dang pawhin an kalpui dan a nih thu a sawi a, hei hian a tha zawnga nghawng a neih chhoh zel a beisei thu a sawi a ni.

<><><>

GOVERNOR

Cooperation Department, National Bank for Agriculture and Rural Development (NABARD) leh Mizoram Cooperative Apex Bank Ltd., hotuten vawiin khan Larsap, General (Retd) Vijay Kumar Singh chu Lok Bhavanah hmuin, tunhnaia "Scheduled Bank" dinhmuna Mizoram Cooperative Apex Bank hlankai anih chungchang bakah hmalakna dangte an sawipui.

Larsap chuan Mizoram Cooperative Apex Bank Ltd chu scheduled bank an nih tawh avangin State Sawrkar hnuiaia department-te pawhin dan ang taka an dawr theih tawh dawn thu a sawi a. Cooperative Bank-te chu mipui nawlpui tana dawr theih an nih avangin tun aia hmasawn lehzual tura theihtawp chhuah turin a chah a ni.

Mizoram chuan Banking sector-ah bung thar kaiin tunhnaiah Mizoram Cooperative Apex Bank Ltd. chuan 'Scheduled Bank' status a hmu thar a. Gazette of India, April ni 15-a tarlan a nih danin Mizoram Cooperative Apex Bank Ltd. chu Second Schedule of Reserve Bank of India Act, 1934 ah telh a ni dawn ta a ni.

Mizoram Cooperative Apex Bank Ltd. hi July 31, 1982 khan din a ni a. Tun dinhmuna Apex Bank hian branch 35 leh ATM 45 a nei mek a. Deposit cheng vaibelchhe 1930 neiin, loan cheng vaibelchhe 1272 an pe chhuak a, sum dahluh leh loan pek chhuah khaikhinna Credit-Deposit (CD) ratio hi zaa 66 a ni a, Mizorama Bank-te zinga loan pe chhuak tha berte zinga mi a ni mek a ni.

<><><>

ZPM VP RESIGN

ZPM Vice President W Chhuanawma, MLA chuan taksa lamah harsatna a neih avangin nimin khan ZPM Vice President (elected) nihna a chelh atangin banna a theh lut.

Akashvani News Aizawl thudawn danin, Tuichang bialtu MLA Pu W Chhuanawma hi semi-stroke avangin phai lam damdawi inah hun engemawchen enkawl a nih hnuah an chenna inah enkawl chhonzawm mek a ni a, taksa lama harsatna a neih avang hian Mizoram Assembly Budget Session hnukung berah pawh khan a tel tawh lo a ni.

Nimin khan Pu W Chhuanawma chuan taksa lamah harsatna a neih avangin banna a theh lut a, hetihlai hian MLA a nihna atang erawh chuan banna a theh lut lo thung a. A banna thehluh chungchangah hian vawin khan ZPM Political Affairs Committee (PAC) an thukhawm a, a banna thehluh hi an pawm leh pawm loh erawh hriat a la ni lo thung.

ZPM party chuan Vice President pathum nei mekin an zingah Pu W Chhuanawma chauh thlan a ni a, midang pahnih- Pu VL Zaithanzama, MLA leh Pu C Lalunnema te chu ruat an ni thung.

Nilaini khan ZPM President ni lai, Pu Lalliansawta chu taksa lam harsatna avangin hun eng emaw chen a chawlh a ngaih dawn avangin, a chawlh chhunga president dinhmun lo luah turin ZPM Legislature Party Leader, Chief Minister Lalduhoma chu President charge la turin ZPM party chuan a lo ruat tawh bawk a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

BOOK OF THE YEAR

Mizo Thu leh Hla Inpui (Mizo Academy of Letters) chuan an pawl din champha lawmna vawiina Aizawla an hmannah 'Kham leh Suar' thawnthu ziaktu Pu Lalrammawia Ngente hnenah Book of the Year 2025 chawimawina thu zia leh pawisa fai Rs 10000 a hlan.

He hun hi Art & Cultur Director Pi Carol VLMS. Dawngkimin a hmanpui a, Dr. Darchuailova Renthlei, Dr. H. Laldinmawia leh Tv Lalringgheta te lehkhabu a tlangzarh nghal baw a ni.

MAL in Book of the Year 2025 a hlan chhan thuziakah chuan "He lehkhabu hian mihring nun chhungril khawharna leh hmun hlauhawm tak tak a hai lang a, khawtlang nun inthlak meka sual ngaihnamnain nun a tihchhiat dan te, Pathian hmangaihna leh beiseina nungin sual thûk taka tlu tawh pawh a tuam dam theih zia te thiam takin a tar lang tih a ni.

DIPR



POSHAN PAKHWADA

Ram pum huapa eitur tha ei tura inzirtirna Poshan Pakhwada chu kar 2 chhung, tun thla April ni 9 atanga neih a nih hnuah vawiin khan Mizoramah a tlangkawm a ni.

Poshan Pakhwada hi Women and Child Development Deparment te chuan Anganwadi Centre tinah programe chi hrang hrang nen an kalpui a, naupang leh nuten an hlawkpuiin an hlimpui hle ni a thudawn a ni a. Naupangte an hriatna kaihtawh kawngah te zirtirna pek an ni a, cooking competition te an nei a, phone, computer leh TV hma a hun hman tlem thatna an inzirtir a, naupang nungchang leh rilru zirchianna te, video clip hmanga awareness pek chhuah te leh tlan (Nutri Run) te leh thil dang dang huaihawt a ni.

Mizorama Anganwadi Centre te chuan Poshan Pakhwada hi an hmang tha hle a, centre, block, district leh state level ah theihtawpin tan lak a ni bawk.

Corr: Maremi



PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chung leh ram pawn mipuite hnenah thu a sawi leh dawn a, Tun tum ami hi a tum 133-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

(Newsonair)



ELECTION

Vawiin khan West Bengal Assembly inthlan thawhkhatna leh Tamil Nadu Assembly inthlan vote thlak a ni a. Hriat theih chinah tlai dar 3 thleng khan Tamil Nadu-ah chuan vote zaa 70 vel a tla a. West Bengal ah vote zaa 79 vel a tla tawh bawk a ni. Inthlanna hmunah te hian venhimna khauh taka kalpui a ni a.

West Bengal ah chuan inthlan thawhkhatnaah Assembly bial 152 ah vote thlak a ni a. Candidate hi 1478 awmin an zingah hian hmeichhia 167 an awm a. Polling Stations 44376 siam a ni a. Heng zinga 5600 hi hmeichhiate chauhin an enkawl Polling station a ni.

Tamil Nadu-ah chuan assembly bial 234 ah vote thlak a ni a. Polling station 75065 awmin Voter vaibelchhe 5 nuai 73 sing li sang 3 leh 291 ten thawkhata neih turah an aiawh roreltu an thlang a ni.

Heng state pahnih inthlan vote tla te hi thlaleh May ni 4 hian Assam,Keralam leh Poducherry te nen a ruala chhiar a ni ang.

(Newsonair)

<><><>